

書
集
傳
或
問

書集傳或問卷下

說命上

林氏曰古者祖有功宗有德創業有功者祀以爲禘祫文之有德者祀以爲宗其廟皆百世不毀商立廟制所祖者湯所宗者太甲太戊武丁太甲爲太宗太戊爲中宗武丁爲高宗其制至漢猶存高祖世祖皆爲一代之祖前漢以文帝爲太宗武帝爲世宗宣帝爲中宗後漢以明帝爲顯宗章帝爲肅宗皆以功德而祖宗之也唐自太宗至昭宗十八帝皆以宗名爲廟號之常稱不復論德建爲不毀之廟而先王立宗之制紊矣此說善

東陽馬氏曰三年之制漢文帝以日易月二十七日而畢後世未遵用之夫天子持三年之喪則百官亦須用持其禮幾於難行至於二十七日喪畢之說則又幾於不持喪然則若之

何而可曰行二十七日之制於臨朝聽政之時而行三等之制於官中則於禮不廢於義亦不廢此通行之道也壽皇持高宗之喪如此

袁氏曰高宗不言中有多少工夫所以能神交上帝所以能得良弼皆自不言中來大抵寡言者其工夫必添多言者其工夫必減寡言者其工夫日積多言者其工夫馳散如人之取樂喜怒蘊蓄於中未便散若泄之於外則不久而息故古者言之不出耻躬之不逮也孔子亦云予欲無言古之進道者其言語極少誠以多言最減力譬之天將雨迅雷一震往往未必有雨何則其氣泄故也高宗三年不言既免喪而猶不言則其涵養於中者爲如何哉

呂氏曰自古聖賢常自恐懼中入台恐德弗類此入聖作德之門戶也學者亦當常懷此心常情懈怠弛慢故流入於庸愚

而不自知

或曰德弗類猶弗稱也記曰天子與天地參故德配天地此德之類者也亦通

王氏曰古之人齋三日以致其思必見其所為齋者況於恭默思道致一而深思則感格上帝夢賚良弼蓋無足怪者淺陋之人不知天人之際至誠可以感通如此

王橋謂上帝以布命于下此最善教之大者

三山陳氏曰至誠之道可以前知高前有童五經隱者也伊川聞其名特往造焉至中途遇之曰君非程先生乎先生欲來信息甚大尹子問於伊川伊川曰靜則自明觀此則高宗夢說之事不誣矣又曰高宗之夢如明鑑當臺有物必照初非鑑往亦非物來陳氏曰高宗誠心如此向使不夢良弼天下之賢亦有緣感而至者亦善

夏氏曰作礪作舟楫作鉢兩蓋聖之切賴之深言之不足故重
言之王氏乃謂作礪使之治已舟楫使之濟難察兩使之澤
民失之空鑿文言啓乃心沃朕心則高宗惟欲其成已德
而已未及乎濟難澤民也此說善

林氏曰桀以拒諫喪湯以從諫興紂以拒諫喪武王以從諫興
秦隋以拒諫喪漢高祖唐太宗以從諫興歷代興衰之本未
嘗不係立此高宗命傅說以納諫而傅說復之以從諫蓋以
爲天下之事未有不先於此故權樂刑政未嘗一言及之而
惟以此相告勉此說亦善

說命中

或問天聰明諸儒皆以視聽言之子獨不然曰聰明之義堯與
說之詳矣夫天視自我民視天聽自我民聽方可以視聽言
然亦自民而言之非謂天果有耳目也新安王氏之說亦近

之王曰蓋天聰明則聞見不在耳目在一心此心洞然與天為一
之與是理私為蔽乎其間則察乎眾人之所不及見偏乎眾人之所
不及聞謂心之所有無非天理
故其聰明無異天之聰明也

呂氏曰佛老說聰明止就虛處說但言吾心湛然而已聖賢說
聰明皆在實處理會口與甲冑等四者疑若粗傳說却欲高
宗於此留心蓋天下之理本無精粗才理會得處處透便理
會得精處透四事自迹觀之何與聰明然知啓羞起戎在箇
省躬非聰明者不能是乃所謂克明也

無垢張氏曰人之好善者多喜聞人之贊而惡聞人之謗非好
勝也以其好善之心急惟恐惡聲之染其身也是以耻過而
遂非其實以善為之反自陷於不善此為善者之大病也梁
武帝心欲為善而不知其道凡人之所難者皆為之一聞實
孫之諫乃大怒此非尋常無知之過也其病最深惟力行者
知之

呂氏曰人有好底病有不好底病高宗之黷祀是好底病最難治惟說能治之無垢張氏曰數于祭祀所以敬也而反墮於不敬此過難知而亦難言難知則心安難言則諫者必拒或問惟說不言有敬咎諸家皆謂君已成德則臣方敢言如何曰君資臣之言正以德之未成故耳德苟已成則何俟於臣言而臣欽若將順亦有所不必言也以君能行之而後言則可若以君德已成而後言則德之未成者果何賴耶或曰林氏謂允協先王成德爲能合威湯從諫弗拂之德故言惟說不言有敬咎曰從諫固能成德然謂成德爲從諫則牽強矣且高宗謂說之言旨哉乃不良于言子罔聞于行蓋養美其言之可行耳非於此方求其言也故說答以知我之言易行我之言難我既已言則已無咎矣所以益勸高宗之行也

說命下

或問甘盤之事孔氏蘇氏說如何曰唐孔氏謂甘盤在小乙之世已爲大臣小乙崩受遺輔政及高宗免喪甘盤已死此說與君奭之書不相背矣然二孔以遜于荒野爲高宗自遜故學而中廢雖文勢爲順友與舊勞于外之言相應然高宗之勞于外乃是未即位之前甘盤既輔高宗初政不應學而中廢又不應以未即位前之事雜於其中其說不免首尾自相矛盾蘇氏謂古之君子雖明王之世不肯仕如巢由夷齊之比則以甘盤爲隱而不仕與君奭之書又相背矣皆不若林說爲善

呂氏曰自高宗言之凡人學未知味失其師猶不覺既知味而失其師如中流失楫高宗之學正賴於說自甘盤言之終不成教高宗一半便棄去此乃甘盤深教高宗處若使甘盤常在左右高宗常依靠人了未必進步惟被它翻然引去高宗

乃能力求其進過人數等此說亦善

或問道我所固有也本未嘗去何謂之來本未嘗散何謂之積
曰是固然也人惟蔽於物欲放而不求故未嘗來蕩而不收
故未嘗積今學力既加脩者始來來自吾心而非由外至也
來者始積積于吾身而非由外假也王氏張氏謂學自外至
故言乃來蓋不知所學之事皆吾性分本然之理曷嘗強其
所無哉

或問諸家多以遜志爲卑遜子以遜順平易爲說何也曰言遜
順則從容卑遜之意皆存於中而卑遜却不足以包從容涵
養之意也

泰誓

吳氏曰孔子論文王曰有事君之小心又曰三分天下有其二
以服事殷周之德可謂至德矣詩序曰西有昆夷之患北有

撥紂之難以天子之命命將帥遣戍役以守衛中國當紂為
四夷交侵之時文王猶稟命如此觀文王之心之德與其稟
命恐所謂大勲者初未嘗有意也至武王時則紂之惡極矣
武王雖欲為文王之順而仁有所不忍故奉天命以征之方
欲警諸侯以必其征伐之功其叙文王之辭蓋不得不然後
世讀書至惟九年大統未集予小子其承厥志讀詩至武王
廣文王之聲卒其伐功與此之類皆當三思詩序與孔子之
言此說善

蔡氏曰百姓有過在予一人廣韻云過責也武王言天之視聽
皆自乎民今民皆有責于我謂我不正商罪以民心而察天
意則我之伐商斷必往矣蓋百姓畏紂之虐望周之深而責
武王不即拯已於水火也如湯東面而征西夷怨南面而征
北狄怨之意愚按此說雖近鑿然至下文亦通併附于此

牧誓

或問孟子史記皆言虎賁三千人諸儒多從之而以書序爲誤如何林氏曰虎賁之士必擇其驍勇絕人者爲之在王左右以爲宿衛周禮虎賁氏有虎士八百人成王崩時以虎賁百人逆子釗當成周全盛時其數不過如此武王戎車三百兩則甲士步卒皆在焉而虎賁則在王左右以爲輔衛其有三百人已爲多矣安得尚疑其少而以爲三千人耶蓋史記孟子之書誤也

或問漢孔氏謂朝歌去河四百里牧野在朝歌南二十里武王渡河五日而至赴敵宜速諸儒謂師行二十里武王仁義節制之師不應速於趨利如此皇甫謐云牧野在朝歌南七十里然自河至此亦計三百二十里亦非五日所能至夫謂牧野去朝歌三十里七十里者蓋據近郊二十里遠郊二十里

而言也然漢孔氏謂河去朝歌四百里則其所親見而非臆
說諸儒求其說而不得何也曰予以禹貢河行之道推之堯
時河自碣石入海蓋在東北之極至漢時則河流入海在青
齊之間至近世則河流愈南而近汴泗大抵河流由古至今
自北而愈南竊意武王時河北距朝歌必切近自孔氏去武
王時蓋九百餘年矣所謂去朝歌四百里者恐非武王時河
行之道或曰河行南北信有之矣然說者謂朝歌在今衛州
孟津在今孟州河流雖改易而孟津之至衛則未嘗改易也
曰世代寥遠地里遷易不常漢武帝東移函谷關七百里而
亦謂之函谷關秦時會稽治在今吳縣與今會稽縣相去亦
數百里則古今地里之遠近豈易以名拘要之武王之師決
不應以五日而行三百餘里也

或問生明孔安國以爲月三日孔穎達以爲生明死魄俱是月初而諸儒多從安國之說如何曰朔日月已生明但其明處極微昧明生則魄死矣故爲始死魄魄死則明生矣故爲哉王明薛氏謂哉生明月一日也旁死魄月二日也至望日則明全生而魄全死自望後一日則月生魄魄生則明死矣至晦日則明全死而魄全生故每月之終謂之晦以其魄全晦故也每月之始謂之朔以其明初見故也於晦朔觀月則可見故知當以穎達之說爲正諸儒皆以哉生魄爲十六日夫望之後一日魄始生而望或在十五日或在十六日或在十七日不可定指十六日爲生魄也

愚曰告天地山川非同一祭亦非同辭特舉其大要摠述之耳肆事更征士女醮厭玄黃當是告山川之辭蓋起兵東征未至紂都公路人已迎降如此若告天地乃是未舉兵之初告

而後行安得預言士女迎降之事乎或以爲是指棄黎之時言之亦未可知

夫才老曰湯武之師順乎人而應乎天應乎天者蓋無一而不聽於天也師出自周踰月而後至既陳商郊寅畏俟天休命彼果於致伐者不必若是矣使紂於是時下罪己之詔取平百戰黨而戮之見諸侯而謝其不德願徼福於成湯高宗以無乏其祀彼八百諸侯或有爲之動心者武王未必致伐也今乃率離心之人犯同德之師一矢未加而前徒已倒戈矣天之休命遂集于周而武王亦順而受之嗚呼湯武之有天下豈有心爲之耶

或問孟子言盡信書不如無書書其有不足信者乎東陽馬氏曰六經經秦火又漢儒私相傳授誠難盡信然血流漂杵却不用疑蓋史官紀其成功則爲之辭以侈其事而已安用致

疑而立議論乎或曰然則孟子非乎曰孟子又幾曾錯史官大而言之亦不妨孟子疑之亦不妨凡讀書須自有活法如浩浩滔天天之高如此其可漫之乎此血流漂杵之比並也

晦庵曰孟子此言是言懼後世之感且長不在此人心目

薛氏曰桀紂罪有淺深湯武之放流應乎天而順乎人非湯武所能為也荀卿謂紂卒易向而殺紂賈誼書曰紂將與武王戰陳其卒左億右億鼓之不進皆還其刀向紂紂走還寢朝闕死棄其尸于王門之外民皆進蹙之武王使帷而守之觀者褰帷投石投之者猶未肯信其言魯與書合最可信觀商人怨紂如此雖欲如桀之放得乎此說善

或問微子帝乙元子而有賢德武王克商之後宜奉微子以繼商返二分之天下而退就諸侯之位則當與堯舜並而湯不足進矣曰殷周之時世變已降非復遠古之比紂之死殷人


實殺之使武王欲以天下遜微子一時殷人及八百諸侯能
自安乎夫益佐禹治水功德豈在啓之下況禹又薦益於天
然朝覲謳歌不之益而之啓雖禹之治命不能過微子雖賢
不及武王之聖微子事紂施澤未必洽於民而周世世積行
累功三分天下有其二人心歸之久矣使武王欲以天下與
微子亦不能奪諸天下之心也易曰湯武革命應乎天而順
乎人蓋湯武處世變之極不過能爲順人之事而已而堯舜
不可幾及也

或曰建官惟用賢人然官各有事賢人各有所能如舜九官皆
官也而官所職之事則有司徒司空作士作繆之異禹皋稷
契比賢也而其能則有治水明刑播種敷教之殊故建官以
賢又必隨其人之所能以位其事也愚按此說雖文才德並
用之意然分別官與事亦不可不知也故附于此

洪範

林少穎曰紂之見殺蓋商人倒戈相攻併攻殺紂武王至商欲
赦紂不誅欲如湯放桀已無及矣於是立武庚代商後亦所
以致其不忍之意如湯放桀也

蘇氏曰治民而求勝民者必亡國治病而求勝病者必殒人堯
言鯀方命圯族楚詞言鯀恃直以亡身知其為剛狠好勝者
五行土勝水鯀知此而不通其變求物之方壯不達其怒而
投之以其所畏其爭必大豈獨水哉



關子明曰河圖之文
七前六後八左九右
洛書之文九前一後
三左七右四前左二
前右八後左六後右

邵氏曰圓者星也曆統之數其肇於此乎朱氏曰曆法合二

數始於一也數始於二也合二中以定其法蓋謂天數中必以地數中

於六也合二終以統閏餘謂天數終於九地數終於十是所謂建曆

也方者土也畫州井地之法其倣於此乎朱氏曰州有九井有九

也蓋圓者河圖之數方者洛書之文故義文因之以造易禹

箕叙之而作範也易大傳曰天一地二天三地四天五地六天七地八天九地十

天數五地數五五位相得而各有合天數二十有五地數三十

凡天地之數五十有五此所以成變化而行鬼神也○朱

氏曰此夫子所以發明河圖之數也天地之間一氣而已分

而為二則為陰陽而五行造化萬物終始無不管攝於是故

河圖之位一與六共宗而居乎北二與七為用而居乎南三

與八同道而居乎東四與九為友而居乎西五與十相守而

居乎中蓋其所以為數者不過一陰一陽一奇一耦以兩其

五行而已天者陽之輕清而位乎上者也地者陰之重濁而位乎下者也陽數奇故一三五七九皆屬天所謂天數五也陰數耦故二四六八十皆屬地所謂地數五也天數地數各以其類而相求所謂五位之相得者也天以一生水而地以六成之地以二生火而天以七成之天以三生木而地以八成之地以四生金而天以九成之天以五生土而地以十成之此所謂各有合者也此河圖之全數而諸儒之說也至洛書雖夫子所未言然其象其說已具於前有以通之則劉歆所謂經緯表裏者可見矣或曰河圖洛書之數其所以不同何也曰河圖以五生數統五成數而同處其方蓋揭其全以示人而道其常數之體也洛書以五奇數統四偶數而各居其所蓋主於陽以統陰而肇其變數之用也曰其皆以五居中者何也曰凡數之始一陰一陽而已矣陽之象圓圓

者徑一而圍三陰之象方方者徑一而圍四圍三者以一爲一故參其一陽而爲三圍四者以二爲一故兩其一陰而爲二所謂參天兩地者也三三之合則爲五矣此河圖洛書之數所以皆以五爲中也然河圖以生數爲主故其中之所以爲五者亦具五生數之象其下一點天一之象也其上一點地二之象也其左一點天三之象也其右一點地四之象也其中一點天五之象也洛書以奇數爲主故其中之所以爲五者亦具五奇數之象其下一點亦天一之象也其左一點亦天三之象也其中一點亦天五之象也其右一點則天七之象也其上一點則天九之象也其數與位皆三同而二異蓋陽不可易而陰可易成數雖陽固亦生之陰也曰中央之五旣爲五數之象矣然則其爲數也奈何曰以數言之則通乎一圖由內及外固各有積實可紀之數然河圖之一二二三

四各居其五象本方之外而六七八九十者又各因五而得數以附于其生數之外洛書之一三九七亦各居其五象本方之外而二四六八者又各因其類以附于奇數之側蓋中者為主而外者為客正者為君而側者為臣亦各有條而不紊也曰其多寡之不同何也曰河圖主全故極於十而奇耦之位均論其積實然後見其耦贏而奇乏也洛書主變故極於九而其位與實皆奇贏而耦乏也橫渠張氏曰數止於十窮於九而其位與實皆奇贏而耦乏也則自十而反一又數備止於九九陽極也地數無過五數之理說有地大於天乎十也洛書為九之耦必皆虛其中然後陰陽之數均於二十而無偏側曰其叙之不同何也曰河圖以生出之次言之則始下次上次左次右以復于中而又始于下也以運行之次言之則始東次南次中次西次北左旋一周而又始于東也其生數之在內者則陽居下左而陰居上右也其成數之在外者則陰居下左而陽居上右也洛書之次序

陽數則首北次東次中次西次南其陰數則首西南次東南次西北次東北也合而言之則首北次西南次東南次中次西北次西次東北而究于南也其運行則水克火火克金金克木木克土右旋一周而土復克水也是亦各有說矣曰其七八九六之數不同何也曰河圖六七八九既附于生數之外矣此陰陽老少饒乏之正也其九者生數一二三之積也故自北而東自東而西以成於四之外其六者生數二四之積也故自南而西自西而北以成於一之外七則九之自西而南者也八則六之自北而東者也此又陰陽老少互藏其宅之變也洛書之縱橫十五而七八九六迭爲消長虛五分十而一合九二合八三合七四合六則參伍錯綜無適而不遇其合焉此變化無窮之所以妙也曰然則聖人之則之也奈何曰則河圖者虛其中則洛書者摠其實也河圖之

虛五與十者太極也奇數二十耦數二十者兩儀也以一二三四爲六七八九者四象也析四方之合以爲乾坤離坎補四隅之空以爲兌震艮巽者八卦也洛書之實其一爲五行其二爲五事其三爲八政其四爲五紀其五爲皇極其六爲三德其七爲稽疑其八爲庶徵其九爲福極其位與數七曉然矣曰洛書而虛中五則亦太極也奇偶之各居二十則亦兩儀也一二三四而含九八七六縱橫十五而互爲七八九六則亦四象也四方之正以爲乾坤離坎四隅之偏以爲兌震艮巽則亦八卦也河圖之一六爲水二七爲火三八爲木四九爲金五十爲土則固洪範之五行而五十五者又九疇之子目也是洛書固可以爲易河圖亦可以爲範矣是其時雖有先後數雖有多寡其爲理則一而已但易乃伏羲之所先得乎圖而初無待於書範則禹之所獨得乎書而未必追

攷於圖爾且以河圖而虛十則洛書四十有五之數也虛五則大衍五十之數也積五與十則洛書縱橫十五之數也以五乘十以十乘五則又皆大衍之數也洛書之五又自含五則得十而通爲大衍之數矣積五與十則得十五而通爲河圖之數矣苟明乎此則橫斜曲直無所不通而河圖洛書又豈有先後彼此之間哉。蔡元定曰天地之理一而已矣雖時有古今其理固不容於有二也不特河圖洛書爲然律呂有五聲十二律而其相乘之數究於六十日名有十幹十二支而其相乘之數亦究於六十二者皆出於易之後其起數又各不同然與易之陰陽策數老少自相配合皆爲六十無不若合符契下至運氣參同太一之屬雖不足道然亦無不相通蓋自然之理也假令今世復有圖書者出其數亦必相符或問晦庵以爲洛書止有奇偶之數自一至九而無文字禹因

而類之則以初一日五行而下皆禹所自言也馬融云從五行已下至六極洛書文也小劉以爲龜文止二十字則與馬融之說同唐孔氏推明孔安國之說以爲禹因而第之以成九類自初一日等二十七字爲禹所加其敬用農用等一十八字大劉及顧氏以爲龜背先有摠二十八字劉歆則以自初一日至六極一章摠爲洛書之文諸說孰是曰衆言殺亂折諸聖以經文詳之說之洛出書則必有書矣謂之天乃錫禹洪範九疇則必有九疇錫之矣如朱氏之說則洛書止有其數而無其文則經何以言出書何以言錫九疇今以洛書之數按之五居數之中固可知其爲皇極矣然天一陽數居於下知其爲水可也何以知其爲五行地二陰數居於西南何以知其爲五事天三陽數居於東何以知其爲八政乎意其必有文畫如馬融所謂從五行至六極類見於各數之下而

禹乃從而類之數至若大劉顧氏以敬用農用爲洛書之文
劉歆以自初一日已下一章檢爲洛書之文則又未免尊信
太過而涉於附會矣唐孔氏所謂天語簡略不應寧曲折
如是也曰河圖何以知其爲八卦也曰河圖之爲八卦固可
以方位陰陽奇偶之數而推也如一與六居北則是天一生
水地六成之而水位之所居可以知其爲坎矣而坎以一陽
居二陰之中二與七同居於南則是地二生火而天七成之
火位之所居而可以知其爲離而離以一陰居二陽之中以
至三與八居於東而爲巽四與九居於西而爲兌皆可以陰
陽奇偶而推蓋八卦皆造化之定數而九疇則以人事參之
其數雖同而其事固不同也然則圖書之事果有他物可以
證乎曰是不待遠求顧氏未之思耳夫鳥獸之羽毛草木之
英華文章燦然條理秩然豈待人刻畫而後爾哉亦造化之

所自成耳此猶曰是形有種類也至若文石之中固有星斗山川草木鳥獸之形又豈人力所筆而後成哉天地之間有此理則有此象如魯仲子生而有文在其手秦之卜石起而有文漢之虫食柳葉而成文古今此類非一世俗之震死者皆上往往有篆書以述其罪道家多能辨之又嘗其仙親寫為詩詞以言禍福皆耳目所親接者况聖人出而天下愛道圖書呈祥圖之與書其體一耳既能有圖亦能有書又何異耶蘇氏曰圖書之入必粗有八卦九疇之象數以備伏義與禹之智耳豈可謂神哉○無字之書一筆一劃此山石有芒麟鳳牛虎人馬於此上若八卦列宿等書者皆書子西曰此與河圖洛書又何以異乎潛符無伏藏神而於莫能預解之義

朱氏曰天地間惟有一理自兩儀莫位其理已彰太極於無味小極於無內即事即物莫非是理之流行發見但其事事物之常見者聖人不假之以設教若河圖洛書乃聖明在上和氣所感鍾為祥瑞即是理之徵驗顯見已可以開發人心故聖

人因神物之至著者以垂法後世其理則未有圖書以前
固無時無處而不存邵子所謂畫前元有易程子所謂使無
河圖洛書八卦九疇亦須作者是也

新安王氏曰易與範其體不同實相爲用易者盡天下之變而
不可常者也範者立天下之法而不可易者也夫易始於乾
坤變爲八卦重爲六十四其道本於剛柔迭出以趨時適中
然言道則詳言政則略如獲之制禮豫之作樂散於諸卦未
見夫綱領所在故以一定之法著於洪範其端木於五行其
用起於五事而終於福極先後本末有叙而不可紊有辨而
不可雜故易範合而聖人所以爲天下者始無餘蘊學者所
宜深致也

易範本於義理尚
皆然於商季

或問太極判而爲陰陽陰陽布而爲五行何以言初一日五行
乎曰九疇皆即其用之切於人者言之故自五行說起

或問周子無極而太極一語先儒辨論角立如何曰蒙山以無
極爲非則以爲此非周子之言南軒以爲此乃集之爲而爲
之之意非真言無是皆不欲言無之一字而爲此辨也夫天
地造化若人若物其初皆自無而至有有者復歸於無而無
者復能有觀人物之生死可見此人之所共知所親親非有
渺茫難測之理推而至於天地之先造物之始未有不自然
而至有也故詩曰上天之載熙聲無臭繫辭曰易有太極即
此之謂也但聖人淪於無措於有故於易之中止明消
息盈虛聚散盛衰循環不息之理而不言有無夫是之謂易
至老氏則專言無釋氏則專言空故儒者非無與空兩字諱
之夫老氏知無之爲無而不知無者之能有及其既有則不
可以無言此其所蔽耳然而始無之理豈可以其出於老氏
而諱之耶釋氏知有之必空而不知空者之復有此其所蔽

耳然而終無之理豈可以其出於釋氏而諱之耶夫謂之太極則其有已肇矣非有則何所指以爲極夫既肇於有則示有之先非無而何其曰無極而太極此理之自然而然者也但聖人不言而周子言之耳何疑之有

或問天一生水亦有物之可證乎曰人之一身可以證矣人六貪心動則津生哀心動則淚生愧心動則汗生欲心動則精生方人心寂然不動之時則太極也此心之動則太極動而生陽也心一動而水生則天一生水也蓋神爲氣主神動則氣隨氣爲水母氣聚則水生故呵氣而成潤也

五行之相對也所以相成而五常之德亦然德莫大於仁木德也仁或失於弱故以義斷之義金德也義或失於剛故以禮節之禮火德也禮或失於拘故以智通之智水德也智或失於詐故以信正之五常之策而五行相對之理老蘇之說爲

然金尅木剛勝柔也水尅火柔勝剛也

王氏曰水言潤則火爆土溽木敷金斂可知也火言炎則水冽土蒸木溫金清可知也水言下火言上則木左金右土中央可知也木言曲直則土圓金方火銳水平可知也金言從革則木變土化水因火革可知也土言稼穡則水之井洫火之爨冶木金之爲器械可知也所謂木變者何炳之而爲火燥之而爲土此之謂變所謂土化者何能燥能潤能敷能斂此之謂化水因者何因甘而甘因苦而苦因暑而蒼因白而白此之謂因火革者何革生以爲熟革柔以爲剛革剛以爲柔此之謂革金亦能化可以圓可以平可以銳可以曲直然非火革則不能自化故命之曰從革也

或問孔氏以皇極爲大中諸儒多祖其說晦庵祖五行志謂皇者君之稱謂人君立極也二說如何曰中道固大而大亦中

之體也然謂中爲天下之大本則可謂爲大中之道則義訓
未爲穩暢故六經語並言中多矣而未嘗有大中之說夫以
皇極爲大中猶可也以皇建有極爲大建其極猶可也以皇
則受之爲大則受之猶可也至於惟皇作極爲惟大作極時
人斯其惟皇之極爲惟大之極則非辭矣故知晦庵取漢志
之說爲當然不曰帝極王極君極而獨謂之皇極者蓋皇帝
之皇亦取大而無際之義人君建極非廢大無外則不可未
有狹小而能建極以率天下歸極者也故名曰皇極亦兼大
義然下文不曰遵皇之義遵皇之道惟天下皇而皆言王者
此又取其合於王者之道而言之蓋皇道之朴略與王道又
有間矣

或問皇則受之曾氏謂大則受之非小者所能受如何曰皇則
受之與上汝則念之正是對而互文或言汝或言皇猶或言

子汝極而又言惟皇作極同

劉執中曰天地之於物也能生之而莫能終而遂其性也能終而遂其性者聖人也天地於人也能性之而莫能化而一於善也能化而一於善者聖人也非聖人則不能成天地造化之功非天地則不能成聖人皇極之治其道相參其能相須其力相敵故曰三才也此說爲善

蘇氏曰正直如以直報怨之直平安無事用正直而已此說善橫渠張氏曰陰性凝聚陽性發散陰聚之陽必散之其勢均散陽爲陰累則相持爲雨而降陰爲陽得則飄揚爲雲而升故雲物班布太虛者陰爲風驅除聚而未散者也凡陰氣聚陽在內者不得出則奮擊而爲雷霆陽在外者不得入則周旋不捨而爲風其聚有遠近虛實故風雷有小大暴緩和而散則爲霜雪雨露不和而散則爲疾氣霾曠陰常散緩受於陰

陽則風雨調寒暑正

劉氏曰一德正於中則五事治於外一氣正於中則五氣順於時以形而言則各宜類舉聖人觀之所以感已政之得失也以德而召則不可以形拘聖人行之所以應天者以淵默也漢儒於兩不時若則棄德而修貌賜不時若則捨心而求言其失不已遠乎其惑不已甚乎此聖人所以正皇極於五事之先調元氣於日時之始者為得其本也驗其政教之得失不可以外於形矣求其應之本原不可以失乎德矣此說詳明

林氏曰夫堯舜之世則民仁壽非其生而皆仁壽也堯舜之治天下彝倫攸叙休徵時至則不期於仁壽而自仁壽也桀紂之世則民鄙夭非其生而皆鄙夭也桀紂之治天下彝倫攸斁咎徵相仍則不期於鄙夭而自鄙夭也故仁壽鄙夭雖本於

天而君實制其命

旅獒

林氏曰以遠物為寶則必有輕賢之心以賢為寶則於遠物非貴矣虞公以垂棘之璧屈產之乘為寶故視宮室奇若路人齊威王以四臣為寶故視徑寸之珠如糞土人君所寶可不謹哉亦善

呂氏曰天下之事才滿則傾惟聖人之心常不足常不已雖到堯舜田地猶有不足之意猶有要做底事一寶未盡之工夫常在非謂止欠一寶做了便了大抵王業雖有成聖人之心朱嘗有成也

愚按此說雖未必是經之本意然聖人之心實然

金縢

或問孫氏謂爾汝之稱在常人為不敬而周公稱之見父子之間用情也曰按經傳告神之辭多爾汝武成告天地山川曰

惟尔有神尚克相予詩祈穀于上帝曰既昭假爾禮記燕辭
曰假爾泰筮有常下至離騷九章祀神多言余今世祝文亦
多言爾神蓋自古而然或者與神相親之意耶若曰父子用
情然子之事父曷嘗稱爾汝乎

或問我之弗祥焉鄭皆音避陳少南其才叔推其說以爲周公
遭謗故居東都以避之至二年成王方知流言爲管蔡之罪
故言罪人斯得金縢既啓之後成王迎周公以歸管蔡懼而
與般叛故周公再往東征耳曰幽風諸詩其言與金縢所書
皆昭然相合大誥叙言武王崩二監及奭叛周公相成王
將黜般作大誥金縢言武王既薨管叔及羣弟流言則流言
與叛皆在武王始崩之際不得分爲兩節明矣亦非養寇三
年而後始征也少南才叔之意不過謂成王方疑周公周公
不應自往征以重成王之疑故爲此說耳不知周公爲東伯

東諸侯之不軌東伯之職自得專征成王幼未親政凡事皆聽於師傳二公居中調護成王中心雖不能無疑亦未敢明沮周公之行兼成王諒闇於國家之事皆不與知一惟冢宰是任在周公固可專其事矣四國之變征之少緩則蔓延莫遏周公豈敢顧一己之小嫌忘宗社之大計耶迨夫三監伏辜遂居東守東伯之職以俟朝命而不敢遽歸此則公之避遠權勢以待成王之悟也以經證經正不必如二氏之遷就牽合

呂氏曰豳詩皆言周大夫刺朝廷之不知則非獨成王不知周公二公亦不知矣蓋二公非不知但成王方在未敢誚公之時使二公一旦迫之成王從則幸不從則不可繼矣故但涵養其意使之一旦自悟周大夫之刺亦不爲過蓋成王未知周公則二公豈得爲知周公哉成王知則二公始爲知周公

矣此君臣一體之義也

林氏曰周公作鷦鷯之詩成王猶未信於心然則周公之心非金縢則不可得而見而金縢之書自二公而下皆所不知非天誘其衷則成王之疑何時而釋乎成王之疑不釋則國之存亡未可知然文武膺上天之休命其社稷無疆之傳豈未艾也周公之德既足以當天意此所以有雷風之變以顯周公之德而剖成王之疑夫周公之藏是書以故事而藏之而非將以爲異日自解之計成王之啓是書以故事欲卜而啓之而非逆知前日周公之舉是皆出於莫之爲而爲也謂之非天可乎

大誥

或問之蓋之叛其執辭非以惡周正將以攻周公也人欲攻己已惡其事而親統師以征之何以釋人之疑且周公何不以

東征委太公而已則居朝廷以爲內鎮耶曰聖人誠貫天地固無顧於小嫌而二公在朝已足以爲內助故親往伐而不敢以艱難遺它人况自陝以東周公主之則征東諸侯固周公之職分也蘇氏晁錯論曰天下無故而發大難之端吾發之吾能收之然後免難於天下事至而循循焉欲去之使它任其責則天下之禍必集於我晁錯盡忠爲漢謀弱諸侯諸侯並起以誅錯爲名使錯以身任其危日夜淬厲東向以待之使不至於累其君則天子將恃之以爲無恐雖有百表盜可得而間哉惟其欲自全其身使天子自將而已居守故表盜得以行其說蘇氏之論其亦有合於周公東征之意歟或問十夫十人或以爲十亂或以爲四國之賢者曰若十亂即周公太公召公實在其中周公不應自言亦不應言十夫必是在下踈遠之賢若良平之於漢房杜之於唐之類但未知

必自四國而來也

微子之命

或問其氏說微子之命非始封之書如何其曰屬殷之後正武庚

地與民皆以封康叔時微子已封於宋矣乃即其國封為上公為二王後以饒殷祀書之所載蓋如此亦於禮為首而微子乃謂武王下車投殷後於宋者則封微子也然饒殷之後者固已正武庚於故都矣不知記禮者何所據而言凡策命諸侯必有初封之辭如蔡仲之命言乃命諸王邦之於蔡之類微子之封於宋蓋在武王時此書又附為上公申命之書如孔氏之說則是微子前出未封至成王而始封非矣惟史記世家言周公既受成王命誅武庚乃命微子啓代殷後奉其先祀作微子之命以申之其意為是惜其有未盡者既言國于宋又謂殷之餘民其蒙戴之失微子之代武庚者代為殷後也殷之餘民自以封康叔而微子初未嘗居武庚之地而治殷民也

其說是也夫武王且封箕子於朝鮮豈應捨微子不封至成

王誅武庚而始封之哉樂記言殷之後者猶由黃帝之後帝

堯之後謂其後裔云耳非必曰為先代後以作賓也史記言

殷民愛戴雖不審而言作微子之命以申之則與樂記書叙

合矣

蘇氏曰武庚叛後命微子微子蓋處可疑之地而命之曰上帝時豈弘乃烈祖萬邦作式此三代之事後世所不及也此說是

康誥

或問其才叔因朕其弟之言以康誥爲武王之書如何曰經言周公洪大誥治則此書爲周公以成王命誥明矣雖朕其弟一言可疑如呂氏陳氏之說以意逆志亦無所害若以爲武王書則牴牾非一書叙言成王既伐管叔蔡叔以殷餘民封康叔篇內言保殷民夫武王封武庚而以管蔡霍監殷治民不聞以康叔經文及孟子所言最爲明白或祖其說不以聖經明文爲據而以旁曲之說爲證至不通處則諉以聖經脫簡何異捨康莊而由山徑也曰晦庵楚詞辨證曰古書之誤類多讀者若能虛心靜慮徐以求之則解后之間或當偶得

其實顧乃安於苟且徇於穿鑿牽於援據僅得一說而遽觀之便以爲是以故不能得其本真而已誤之中或後生誤此邢子才所以獨有目讀誤書之適實天下之名言也然則此說非乎曰晦庵之言極爲至當夫學者觀書安於循襲者未免失於苟同而喜於矯枉者亦未免失於苟異如吳才叔書裨傳專是致疑於前人之說至於聖經所載而無可疑者或併疑之所得處固有之所失處亦不少此晦庵所以有虛心靜慮徐以求之或得其實之說而豈以苟異爲貴哉

吳氏曰先儒多謂康叔尚幼以此書多稱小子故也康叔武王弟武王九十三而終康叔至此安得尚幼今陝右之俗凡尊之命卑貴之命賤雖長且老者亦以小子呼之若相親愛之辭疑此所謂小子亦然

或問林氏蔡氏論康叔爲司寇事如何

林曰左傳史記言康叔爲司寇顧中書敘爲侯

此書五篇是猶為司寇故此書多言及刑罰。蔡氏曰：篇中言什制者，此書之始也。終曰：往世時皆令其之國之歸而末見其留王制之意。此書之始也。終曰：往世時皆令其之國之歸而末見其留王制之意。或本以什制而此則未必然也。曰：蔡氏之說是也。司寇係天下之命才，可兼出侯國以治民化殷係周室之本，不可兼入王朝以治獄。且古無此明證，其必不然。如蔡氏之說，與經傳亦無抵牾。觀君陳之書，亦言刑則可見矣。

或問要囚諸家之說不一。曰：蘇葉皆以要為獄辭。葉氏曰：獄成而要辭則要當作去聲。猶今世獄成後節款是也。若作斷獄說則要當作平聲。猶今世判結也。二音各不同。而孔氏謂祭其要辭以斷獄，則合兩說而要字却從平聲。模糊難辨。愚謂經文但云要囚而不云要辭，則如今說差穩耳。周禮司寇之屬鄉士遂士縣士皆言聽其獄訟，異其死刑之罪而要之鄭氏注云：要之為其罪法之要辭。如今効矣。愚按此說即如今世獄官之判結罪也。此要字亦當從平聲。夏氏謂要囚乃要勤拘囚之也。

然要囚書有四處陳誥二多士二若如夏說說戰要囚之其
文順順以之說其他三處要囚則不協蓋夏氏只將要囚二
字作連絲字說去恐無所據

或問今以由文王作罰刑為非然則文王之罰刑不可用歟曰
文王教化已至而猶或有不孝不友者則制為刑罰以警之
今殷民染紂之惡陷溺至此教化未加不責臣以敷教而遽
欲用文王之刑罰以加之而不赦其可乎

酒誥

穆考晦庵中庸或問曰昭穆之昭舊讀為韶今從本字何也曰
昭之為言明也以其南面而向明也其讀為韶先儒以為晉
避諱而改之然禮書亦有作召字者則假借而通用耳曰其
為向明何也曰此不可以空言曉也今且假設諸侯之廟以
明之蓋周禮建國之神位左宗廟則五廟皆當在公宮之東

南其制則孫毓以爲外爲都宮太祖在北二昭二穆以次而南是也蓋太祖之廟始封之君居之昭之北廟二世之君居之穆之北廟三世之君居之昭之南廟四世之君居之穆之南廟五世之君居之廟皆南向各有門堂室寢而牆宇四周焉太祖之廟百世不遷餘四廟則六世之後每一易世而一遷其遷之也新主祔于其班之南廟南廟之主遷于北廟北廟親盡則遷其主于太廟之西夾室而謂之祧凡廟主在本廟之室中皆東向及其祔于太廟之室中則唯太祖東向自如而爲最尊之位羣昭之入乎此者皆列於北牖下而南向羣穆之入乎此者皆列於南牖下而北向南向者取其向明故謂之昭北向者取其深邃故謂之穆蓋羣廟之列則左爲昭而右爲穆恰祭之位則北爲昭而南爲穆也曰六世之後一主之生旣祧則三世爲昭而四世爲穆五世爲昭而六世

爲穆乎曰不然也昭常爲昭穆常爲穆禮家之說有明文
蓋二世祧則四世遷昭之北廟六世祧昭之南廟矣三世祧
則五世遷穆之北廟七世祧穆之南廟矣昭者祧則穆者不
遷穆者祧則昭者不動此所以祧必以班尸必以孫而子孫
之列亦以爲序若武王謂文王爲穆考成王稱武王爲昭考
則自其始祧而已然而春秋傳以管蔡成霍爲文之昭邾晉
應韓爲武之穆則雖其既遠而猶不易也豈其交錯彼此若
是之紛紛哉曰廟之始立也二世昭而三世穆四世昭而五
世穆固當以左爲尊而右爲卑矣今乃三世穆而四世昭五
世穆而六世昭則是右反爲尊而左反爲卑也其可乎曰不
然也宗廟之制但以左右爲昭穆而不以昭穆爲尊卑故五
廟同爲都宮則昭常在左穆常在右而外不失其序一世自
爲一廟則昭不見穆穆不見昭而內各全其尊必大禘而會

於一室然後序其尊卑之次則凡已毀未毀之主又畢陳而無所易唯四時之祫不陳毀廟之主則高祖有時而在穆其禮未有考焉意或如此則高之上無昭而特設位於祖之西櫛之下無穆而特設位於曾之東也歟曰然則毀廟云者何也曰春秋傳曰壞廟之道易擔可也敗塗可也說者以爲納新主示有所加耳非盡撤而悉去之也曰然則天子之廟其制若何曰唐之文祖虞之神宗商之七世三宗其詳今不可考獨周制猶有可言然而漢儒之說又已有不同矣謂后稷始封文武受命而主故三廟不毀與親廟四而七者諸儒之說也謂三昭三穆與太祖之廟而七文武爲宗不在數中者劉歆之說也雖其數之不同然其位置遷次宜亦與諸侯之廟無甚異者但如諸儒之說則武王初有天下之時后稷爲太祖而組紘居昭之北廟太王王季穆之北廟王季居昭之

南廟文王君穆之南廟猶爲五廟而已至成王時則組紺祧
王季遷而武王祔至康王時則太王祧文王遷而成王祔至
昭王時則王季祧武王遷而康王祔自此以上亦皆且爲五
廟而祧者藏于太祖之廟至穆王時則文王親盡當祧而以
有功當宗故別立一廟於西北而謂之文世室於是成王遷
昭王祔而爲六廟矣至其王時則武王親盡當祧而亦以有
功當宗故別立一廟於東北謂之武世室於是康王遷穆王
祔而爲七廟矣自是以後則穆之祧者藏於文世室昭之祧
者藏於武世室而不復藏於太廟矣如劉歆之說則周自武
王克商而增立二廟於二昭二穆之上以祀高圉亞圉如前
迹遷至于懿王而始立文世室於二穆之上至孝王時始立
武世室於二昭之上此爲少不同耳曰然則諸儒與劉歆之
說孰爲是曰前代說者多是劉歆愚亦意其或然也曰祖功

宗德之說尚矣而程子獨以爲如此則是爲子孫者得擇其
先祖而祭之也子亦嘗考之乎曰商之三宗周之世室見於
經典皆有明文而功德有無之實天下後世自有公論若必
以此爲嫌則秦政之惡夫子議父臣議君而除謚法者不爲
過矣且程子晚年嘗論本朝廟制亦謂太祖太宗當爲百
世不遷之廟以此而推則知前說若非記者之誤則或出於
一時之言而未必其終身之定論也

呂氏曰不酒于酒亦是常事周公推之直至天若元德人之進
德惟於最難拚捨處放得暇即是進德不已獲天順處蓋舉
世皆溺于酒在當時最爲難捨學者爲學須各隨分量看自
家身上有過惡因循難去者日夜消磨湯滌氣質便進進遷
變方到得天若元德地位此說善

或問劾必殷獻臣一章請說多文離蔡氏說如何

集曰故當用
此說

賢臣與邪臣之不同于酒也蓋與文王與無士同義曰銘
穀少之重也與邪臣同故知所謹況於公否可不謹於酒乎
談勸益多與酒不相干蔡謂用力戒謹於酒雖然無邪士
之怒同極為條達但用力戒謹賢臣宗工使不酒于酒則象
象不然故集傳采林王之說謂勸益猶教家喪相之謂則其
臣皆自知敬畏而不敢酒酒意味又妥貼也

粹材

或問荆公謂德有昏有明自其知不知言之則曰昏曰明晦庵
大學註在明明德亦以心之虛靈知覺為明德子獨以明德
為德本明何也曰二君子說明德大槩皆以智言之夫明德
固本於知然亦非智之一端所能盡若止以智言則所謂仁
義禮信皆非明德乎書所謂先王勤用明德惟馨克謹
明德左氏傳所謂美哉禹功明德遠矣豈可獨指以為智言
哉蓋德根於一性本自光明以言其仁則惻隱博愛昭然不

可蔽而非含糊姑息以為愛也以言其義則是非取舍顯然
不可亂而非鶻突苟且以為宜也以言其禮則辭遜節文截
然不可紊而非足恭苟遷以為權也以言其知則洞達於微
而非料度臆察以為知也是所謂明德也至其蔽於物欲則
其明德始昏故惻隱博愛之不明則蔽而為殘忍刻剥矣羞
惡取舍之不明則蔽而為貪冒無耻矣辭遜節文之不明則
蔽而為傲慢驕吝矣是非可否之不明則蔽而為愚瞢憤者
矣是所謂昏德

召誥

或問應氏說百稽如何

應曰天命難測無形聲而能回而斷之朱稽

天之對也天以萬物為言至順之理終日與之對故周旋於所當備

告誥而稽其所若不善不違順之理又此曰面與諸侯環顧而內

之面同應氏就面字上提撥頓切固亦無害於理然此類用
之時又則為深巧用之說經則意味反薄不如止作面向之

渾成講經者所當知也

王氏說命哲命吉凶歷年雖非召公誥戒之本意然不可不知

王曰哲者明也吉凶者禍福也歷年者數也此在
事在物數在時君子修其在我者不責命於天也

或問惟恭奉幣用供王能祈天永命諸儒多以為成王將祀于
新邑故召公奉以助祭曰召公欲王以敬德祈天永命以小
民受天永命耳若然則是欲以禱祠而祈永命乎

洛誥

呂氏曰洛都雖有二城而成周則其摠名杜預孔穎達皆以下
都為成周謂敬王遷于朝之亂自王城徙都之其說不然大
可以包小小不可以包大苟成周信為下都之名則凡書之
言洛者皆謂之成周是以下都之名而包王城其不可信一
也左氏未嘗有敬王自王城遷成周之明文第言子朝既逐
王入于成周而已敬王謂城成周之辭亦謂成王合諸侯于

成周以為東都則成周者洛都之總名明矣其不可信一也

上事此解題曰成周乃東都總名河南成周之王城也洛陽成周之下都也王城非天子時會諸侯則遷之今都則洛陽大邑所居治事之地周人朝夕受事習見既又案西指以為成周矣

或問未定于宗禮亦未克殺公功或以為未定所以尊周公之禮為未能安公之功而留之曰周公之致太平自視欲然豈以成王未尊已之功而欲去能尊已之功而始留乎

或問林少穎曰諸家皆以命公後為封伯禽夫必待封伯禽然後留此淺丈夫要君之為豈所以待周公哉康王命畢公保釐東郊皆言惟命公以周公之事又言周公克謹厥始君陳克和厥中惟公克成厥終則周公於殷民蓋實為之司牧非特營洛遷之而已書言命公後者蓋成王祀洛之後復都鎬京故命周公留洛以鎮撫殷民若近世留守留後之謂下文迪將其後惟告周公其後作冊命公後皆此之謂也伯禽與

太公望相先後報政傳記言之甚詳則伯禽封魯固已久矣
曰攷之君陳畢命則周公之留洛鎮撫殷民明矣公曰王命
予來承保乃文祖受命民曰俘來於殷則周公許王留洛以
化殷亦明矣夫成王舉祭祀朝諸侯於洛而實都鎬京則其
留公鎮洛乃必然之理也史記言太公望封於武王之世又
言武王克商封弟叔鮮於管封叔度於蔡封叔旦於魯史記
所言縱未可盡信然武成言武王祭德報功列爵分土則太
公之封必當在武王之世孟子言周公相武王誅紂伐奄則
周之報功而封建親賢孰有賢於周公者乎又言太公之封
於齊周公之封於魯各百里而又並言之則必不應先封太
公至遷洛之後始封周公意者周公之封魯已久而公入爲
相攝政今公欲退老就國故成王留公於朝不使歸魯而竟
命伯禽侯魯豈與如此則非獨與魯煩所言王曰叔父建爾元

初其作新大邑于東國洛陽召諸侯二月乙卯周公朝至于洛則遂觀于新邑
康誥言周公初其東國洛四方民大和會侯甸男邦采

衛百工播民和見士于周召誥言太保乃以庶殷攻位于洛
汭周公命殷庶庶殷不作竊意殷民之當遷者其丁壯即於
此時與四方之民同趨洛赴工而就留居於洛其老弱室家
則俟營洛既成室廬已備而後盡遷居之故洛誥有佻來成
殷之語召誥有敢以備民保受王威德之語而並無遷民之
說多士之叙所謂成周既成遷殷頑民者要其終盡遷之時
而言耳耳表氏曰召誥所謂無新殷民者蓋指其頑民而言
若其正殷之民則見其遷居之樂而不事之利則其心服而道之也昔
者不然而以今之民而一日遷之新邑且立不若彼殷之民之故昔
朕來自奄一章所謂移爾遐逝者東萊謂我明致天罰為移
徙爾于遐逝之地今遷于洛乃使爾比我事我臣我也蔡氏
以為遠徙于洛夫荒陬僻壤可以言遐逝洛去衛非遠況為

土中爲帝居焉可以遐逝言乎若以爲黜殷之後卽遷民于洛非惟無據而周公黜殷在二年之後作洛乃七年之間亦非事勢之宜也蔡氏專攻書叙爲繆故其說若此

新安王氏曰周公諸書未嘗以殷民爲頑成王命君陳始有無忍疾于頑之語非併以爲頑也康王命畢公始有怙殷頑民之說則此叙或出於後之史官故以頑民二字冠於篇首夫殷民不附於周謂之頑可也不志殷先王之德眷眷舊王謂之頑可乎故頑之一字周公未嘗出諸口也此說亦善

無逸

東坡曰人莫不好逸欲而所甚好者生也以其所甚好禁其所好庶幾必信然猶有不信者以逸欲爲未必害生也漢武帝唐明皇豈無欲者哉而壽如此夫多欲而不享國者皆是也漢武明皇千一而已豈可望我飲煖食野葛者必死而曹操

獨不死亦可效乎此說善

林氏曰宋文帝發衡陽王使諸子且勿食至會所殺饌日旰不

至有飢色乃謂曰汝曹少長豐逸不知百姓艱苦今使汝曹

識有飢苦知節儉耳唐明皇嘗種麥于苑中率太子以下親

往芟之曰此所以薦宗廟不敢不親且欲使汝曹知稼穡艱

難耳又曰深山窮谷之民暴露勞苦窮年不休終身不知聲

色香味之可好故其壽多至百年其居于都邑者有紛華之

色樂嗜欲之可玩故多夭死以是觀之人居之壽豈不本于

無逸乎又曰陶侃在廣州無事輒朝運百甕于甌外暮運百

甕于甌內曰吾方致力中原過爾優游恐不堪事侃之心以

一日之逸其害如此人君知此則豈以今日耽樂為可哉皆
善

新安王氏曰殷二十九君以甲名者六曰太甲小甲在大戊之

前曰河亶甲沃甲陽甲在成丁之前又七世有帝甲國語司

馬遷帝紀以帝甲為祖甲而孔氏以太甲為祖甲蓋孔氏因

國語稱帝甲亂之七世而殞意為帝甲必非周公所稱者又

以不義為主與太甲茲乃不義文相似遂以此祖甲為太甲

耳其實不然此書言小人皆謂小民非以為不賢也况先言

不義為王繼言善為小人語無語次作其即位亦不見太甲

復政思庸之意國語說帝甲亂殷又無可見之迹且堯舜之

有未均禹之有太康豈可歸罪于父祖況七世之後乎學者

當捨傳記而從經文可也鄭康成之說雖未見其所據要于

經文為合耳此說是蘇氏曰不意二人同稱祖甲陳氏曰下

周文王及云者因其先後次第之辭也則祖甲之非太甲明矣曰皇極經世曆祖庚之後人諸祖甲起矣蓋乙未不在使

三十袁氏曰周公論三宗無逸但說不敢荒寧不侮鰥寡蓋

古人所謂無逸非謂于事為必躬必親只此心致敬便是無

逸蓋敬則戰戰兢兢惟恐一毫不到安得去逸樂後世人主

如衡石程書皆是君代臣職以此為無逸乃是元首叢脞何

異于自縱逸者大抵古人之無逸此心之無逸也後世之無

逸事為之無逸也

君與

或問陳氏

呂氏若

天悲忱之

說

陳曰我

不敢自

信以為

知天命

若天如

不輔我以

誠數于其

終身順于

天不祥歟

呂氏曰我

之誠曰陳

說句讀雖

順

然上天輔忱

乃必然之理

若以輔忱為

不可知則是

後世誣

天之說也豈其

然乎上文既

曰我不敢知

則是不必乎

天而

惟知順天耳若

以為順天庶

乎輔我之忱

亦恐未免乎

天

兼添了庶幾

輔我之意不

如惟順上天

輔誠之理為

瑩潔也

呂氏曰

弗克恭

上下是不能

嗣前人恭德

也過伏前人

光是

不能繼前人

明德也亦通

畫之文詳畧

互相備于殷

言純佑命王

人罔不秉德

故文王止

言亦惟純佑東德文王言時昭迪見得聞故武王言昭惟冒

稱德

呂氏曰大臣之位百責所萃震撼擊撞欲其震定辛甘燥濕欲

其調濟熙錯紛結欲其解紓黜陟欲其如納自非曠度

惟量未嘗無翩然捨去之意所以欲其猷裕也又曰周公勉

召公以敬大召公所謂不存者豈若常人然哉亦毫釐之間

耳惟周公能見而治之微有不寬隨以猷裕開之微有不存

隨以克敬欽之開欽于渺忽將形之際以洙泗爐錘之妙而

用于豐鎬鼎錡之間也

多方

或問嗚呼王若曰呂王二說如何呂氏曰此篇始言周公曰若無

此體蓋周公處聖人之變故史官發新例以著周公之實未嘗

之文其說曰周公不

詩言糾之惡又終以嗟歎曰二說皆有味但以文勢觀之俱未

若有所傷痛不忍言也為順安君謂史官欲明君臣之分則篇首以周公曰加於王

若曰之上已足見矣不特以嗚呼加王曰之上也若謂周公

以嗟嘆終之則古今之文皆以嗚呼為發語之始朱嘗以嗚

呼為語辭之終也或曰錯簡又未知果然也姑併存之

呂氏曰周公知天未絕紂可也何所見而能數其年蓋我之未

忍民之未厭即天也民由之而不知聖人與天為一動靜又

速極於明著故數其年而謂之五此武王所獨知說者乃牽

合歲月以附其數亦末矣此說是林氏曰此所謂五年正指武

意者文王未崩之前九年蓋亦以紂之惡可伐而不忍伐之故大統

未集也此五年意者武王未克紂之前五年蓋亦以紂之惡可伐而不忍伐之故大統

伐而猶異其政過故領領之也田是觀之用之伐於豈得已而不已

哉晉武帝以孫皓逼羣有割獸之志其百羊節則曰孫皓逼羣已甚

於今可不戰而克若然不幸而沒兵人更立令王雖有百萬之眾長

江未可窺也王若則曰孫皓荒淫宜速征伐若一日之內更立賢王

則強敵也此言正春秋時晉伯宗所謂後之人或者為伯宗奉德義以

事神人而申國其命若之何待之也蓋其意以區區之仁義不足以

易言之大計也。曾武帝之心則惟恐其有賢王而不得逞其欲。武王之心則惟恐其有不改過人之度量相遠。一至於此。不觀晉武無以知武王。亦為至極也。

爾曷不枕裕于爾多方。或說與葉說亦通。或曰枕裕則與理而裕

曰四國叛則多方為之繹。四國定則多方因之休息。則多方之裕在四國也。

陳氏說惟狂克念作聖之說亦善。陳曰孔子曰惟上智與下愚不移。

孔子所言聖狂之成也。成則不可移。愚則不可移。所言聖狂之分也。聖狂之分生於一念之頃。故可改。孔子雖曰不移。實有可移之理。但下愚者

自暴自棄。不肯移耳。若肯移。即是惟狂克念者也。或曰聖狂之分亦有其事乎。曰太甲

初年欲敗度。縱敗禮。可謂狂矣。至居憂悔過。終造迪哲。則狂

而克念。至於通明者也。唐明皇初政。清明亦幾乎通矣。晚年

盛衰至於亂亡。則通明罔念而作狂者也。

三山陳氏曰。以周室天下之大。視商遺民不啻太山壓卵。舉不

服之民而誅戮之以一天下之心。宜不為過。而成王周公謀

諄於口舌間。不能自己。何也是。足以見古人忠厚之心矣。

之聖人不忍有疾圖天下之心寧使吾有遺力而不忍盡其力於天下寧使吾有餘威而不忍盡其威於天下堯不以四凶之害治而遂用操切之政舜不以有苗之逆命用擣其巢穴之師聖人寬綏和柔之政養天下於海涵春育之中曾不以小不如意而遂至於爲逞志之舉也秦漢之後吁亦薄矣三山陳氏曰純一也天之不與夏者純一而不變古者無道之國天或降之災異未遽至於喪亡者蓋天之不畀未純猶有待其改悔之意若夫天之不畀至於純一則無一毫佑順之意矣天之佑商必曰純佑命天之不畀夏必曰不畀純則純者極至之辭也

立政

或問三宅之說何紛紛也曰蘇氏以爲乃事乃牧乃準一篇之中所謂三宅者參差不齊然大要不出是三語此言極當但

蘇說事牧準則未安也曰曰且章主左右常伯常任準人諸說
不同孔說何如孔曰常伯常任準人諸說不同孔說何如
曰孔說太既得矣但以準人為士官則是士師之屬恐非在
王左右亦非職之尊者也曰蘇說如何蘇曰王左右有牧民之
卿曰常任有守法之有司曰準人曰蘇既以常任為公卿矣然公卿之上王之
左右豈復有所謂牧民之長乎曰林夏釋蘇說曰州各有伯
伯即州牧也當時芮伯彤伯皆以公卿兼牧是常伯亦王左
右也曰芮伯彤伯誠為州伯矣然既入為王朝之六卿則所
職者卿之事經中初無兼領州伯之據其為東西二伯者乃
召公畢公而非芮伯彤伯也安得因一伯字遂轉以為常伯
乎至於以準人為守法之有司亦未穩夫守法有司職之微
者也安得稱三宅又安得在王左右乎曰孔以常任為六卿
而又以準人為士官唐孔氏以準人為微官而子乃更六卿

爲衆卿而準人則以爲司寇之屬又何也曰此書後而準以
獄事爲言則知準人爲平法之官明矣但孔既以常任爲六
卿則司寇已在其中故遷準人爲士官以避其重出耳然士
官乃司寇之屬職之小者也以爲三事則未安唐孔氏改爲
獄官是矣然於上文六卿又未免有重故子於此大槩祖二
孔之說而損益之庶不礙耳曰王說如何王曰常伯庶官之長
伯爲庶官之長則其爲準人非曰王說大槩鵠突不明以常
伯爲庶官之長則其爲準人非伯爲庶官之長則其爲準人非
於六卿之外所指何官以君所準者爲準人亦難以定其爲
何職也孫氏常伯常任同王說準人則同孔說葉氏以常伯
爲六卿以常任爲小宰之類固不待論矣準人則以爲師氏
之類蓋其意與王氏同然君德之所準固在公卿乃捨之何
與張氏以準人爲公孤蓋亦推王氏之意耳然公孤職之至

算乃言於三宅之末則不倫矣陳氏常伯常任同蘇氏而準人與孔氏同此其大率然也

或問繼自今我其立政立事牧夫準人及越我周文王立政立事牧夫準人呂氏夏氏皆以立政立事爲一句以牧夫準人爲一句謂三宅略舉其一以互相備如前言常事司牧而不及準惟有司之牧夫而不及準事也或以爲下文言繼自今立政其勿以恤人又言繼自今立政其惟克用常人則知諸家以立政爲一句而以立事爲三宅二說如何曰此書多錯綜互舉未及全文其於勿用恤人克用常人止言立政而不繼言立事者又舉政以見事其呂夏之說文勢穩順諸家之說三宅雖備要未安也

居官

或問書叙呂誥如何呂曰內修外舉治之序也而放王黜陟命無偏

者也。可不先治其亂。室可治。則治乎武庚三監之亂。近在肘腋。實屬王室安危。而惟吏亦聲勢相。而退既除海內。皆是然。後制立法之事。可與固。曰。周禮六官之首。皆曰。惟王建國。體國經野。乃治之。年也。

立其官以爲民極。則宅洛之後。官制已行。雖淮夷再亂。而朝廷之六官。何害於自舉其職。豈待淮夷既滅。而後官制可行耶。蓋成王慮外患既平。內治或至玩弛。故撮舉周禮建官之大旨。儆飭羣臣。使各盡其職。故作周官之書。非至此始行官制也。或問王氏謂公論道而孤弘化。公燮理陰陽而孤寅亮天地。林氏謂其鑿如何。曰。荆公穿鑿固多。至其的確處。不可例以爲鑿。而棄之。林氏多闕王氏其疏暢條達。誠佳。然懲創之過。率略處間。亦不免此類。是也不可不知。

三山陳氏曰。周之六卿。乃三公兼顧命。曰。乃同召太保奭。芮伯彤伯畢公。衛侯毛公。是召公領冢宰。畢公領司馬。毛公領司空矣。惟周公位冢宰。正百工。是以公兼卿也。春秋有宰周公。

是以卿而兼公也自是而後不知古人建官之意漢以太尉爲三公太尉武官也又其後以司徒司馬司空爲三公此諸侯三卿也名實愈舛矣

侯三卿也名實愈鮮矣

或問擾兆民不載呂說何也

呂曰教民而謂之擾蓋與習而熟之之謂也

謂止撫摩而入之之謂也

涵養而充之

之謂也

許味擾之一字

曰舜典言敬敷五教在寬言施教在於

同或之教思過半矣

寬以施教之術而言也此言擾兆民言施教以馴擾其民以

施教之效而言也若冢宰言統百官均四海宗伯言治神人

和上下皆以效言呂說乃敷教在寬之意自其所施而言故

造語雖精恐非經意

或問詰姦隱刑暴亂乃夏氏呂氏林氏之說而子啟爲已說何也夏曰姦詐隱賊乃暴亂之末葉上者暴虐爲亂乃姦隱之已著者姦姦隱特將詰切盡而已暴亂則加之刑焉○呂曰姦隱惡而易知故謂之詰暴虐難而易見宜刑之而已天下之罪案鉅萬曰三說狀便不出此兩問也○林曰姦惡悠言詰暴亂言刑數文也曰三說皆是而意有未全夏氏辨姦姦隱暴亂之相爲本文是矣然謂

姦慝詰而不刑則不可呂氏辨詰與刑精矣然夫互見之義則詰者似爲未必刑刑者似爲未必詰林氏言駁文固得互見之意然不辨姦慝暴亂之所以殊又未免籠侗而無別得此失彼故不得不以己意言之此類多不盡載

自舜命契爲司徒以敷五教王制司空本以量地置邑度地居民伯禹爲司空亦以禹平水土人得平土而居之也今周官謂司徒掌邦教司空掌邦土皆相合周禮大司徒之職則掌建邦土地之圖與其人民之數其間分田制賦徒役之事居多難以十二數及鄉三物教民而不詳及於五典蓋養民而後可教猶有可言至於小司徒鄉大夫遂大夫等職於地利之事尤詳則司空已無可爲者今周禮以爲掌邦事而百工之事皆在焉先儒因以考工記足之竊意文官非止於工之事然其詳不可攷矣

或問六年五服

朝與周禮不同何也

周禮行人侯服歲一見甸

見大服四歲一見甸服五歲一見

曰周禮所謂侯服歲

一見謂第一歲一見也

甸服

二歲

一見謂第二歲

一見也

男服

三歲

一見謂第三歲

一見也至第五歲而衛服一見至第六歲則皆休息正是六

年五服一朝也諸儒疑之過耳左傳所載又與書周禮不同

何也

昭十二年晉人將尋盟齊人不可叔向告于鄭曰明王之制使諸侯歲朝以志業間朝以講禮再朝而會以示威再會而盟以

顯昭

曰叔向所言乃諸侯自相會盟之禮猶小行人所謂凡

諸侯之邦交歲相問殷相聘世相朝云耳非諸侯朝王之禮

也

或問諸家多以為業大於功子獨以為功大於業何也曰功業

對言之則功大而業小予已即學業農業明之矣獨言之則

功與業無異又觀其文意所主如何若曰周家有安民之功

有伐商之功然後能成王業漢高有誅秦之功有蹙項之功

然後能成漢業則業固大於功矣。今戒卿士而功崇以志言業廣以勳言則知人臣能勲勞以廣其職業然後能成輔治之功也。新安王氏之說亦佳。王曰：功成曰功，所修曰業。功之崇高，必始於立志，用志不遠則無他，可以

其高矣。然所修有職，所職有事，非能一日成於有，或也。故當勤而不已，其業可廣，則至於成功矣。
或問子訓驕為矜，肆侈為奢，恭何也？曰：矜以慢於人者，言之謂驕；矜也，肆以縱於己者，言之謂驕。肆也，奢以用物而言之謂奢；侈也，恭以用意而言之謂侈大也。

或問恭儉惟德無載，爾偽何以能作德而不作偽哉？曰：恭儉者禮之發也，本出於吾德之所固有，惟移於物欲故變而為驕侈耳。夫恭敬之心人皆有之，而豐約撙節之宜出於天理之自然，亦莫不各有當然之分，非由外鑠也。惟致知以明之，誠意以實之，則能自得於心矣。然後推此心之莊敬而實行其恭，非內存驕慢而外為足恭也。推此心之節制而實行其儉。

非內欲奢泰而外爲詐儉也是則能作德而不至於作僞矣
君陳

或問君陳或以爲周公之子如何曰陳氏曰周公命康叔曰乃
不顯考文王乃穆考文王成王命蔡仲曰無若爾考之違王
命況周公有大勲勞若命其子以繼父事豈無父子之辭以
寵之哉

或問先儒言君陳爲新進如何曰玩成王告戒之辭固可知君
陳之爲新進至謂斯時當累稽周公之典慮舊臣微作意則
害治體恐未必然蓋君陳之政大體固當法周公然辟以上
辟簡修進良與周公之時合由以容無或刑人殺人之規已
有間矣而謹始和中時世又自不同兼諸老亦非可以作意
害治疑之然則成王之不命諸老而命君陳蓋以君陳自是
當此任耳恐不必過爲之說

顧命

吳氏曰唐虞之際爲嗣君者方三年之喪不知其爲君三代之
時爲嗣君者方三年之喪雖知其爲君而未嘗正爲君之禮
春秋之後爲嗣君者方三年之喪雖正爲君之禮而齊衰之
服未嘗一日而輒去也堯之子丹朱舜之子商均禹之子啓
方居喪時皆不知其果立與否也三年之喪畢謳歌獄訟者
之舜禹而不之采均之啓而不之益故丹朱商均知其不爲
君啓知其爲君故曰唐虞之嗣君不知其爲君也魯昭公深
墨即位而哭弔者致辭皆稽顙而不言百官有司聽於冢宰
三年而後即位故曰三代之嗣君雖知其爲君而未嘗正其
爲君魯伯禽徐戎之征天子之命也猶要絰而從事晉襄公
靖之師杜預之故也猶墨衰而即戎故曰春秋之嗣君雖正
其爲君而齊衰之服未嘗一日而輒去也

君牙

或問蘇氏謂昭王南征不復至齊桓乃以問楚是終穆王之世
君弑而賊不討今君牙問命之書皆無末痛惻怛之語以見
周德之衰何也曰按左氏傳管仲問楚以昭王南征不復楚
人對曰南征不復君其問諸水濱杜預注謂昭王南巡狩涉
漢而溺又言昭王時漢非楚境故楚不服罪言民春秋曰昭
王將兵征蠻荆涉漢梁壞王隕于漢中辛餘靡振王北濟然
則昭王之不復未可便以爲楚人之弑也

東坡曰方成周時越裳氏來朝曰久矣天之無疾風暴雨也中
國其有聖人乎方是時四夷之民莫不戴王然風雨雖天事
非人力者亦歸德於王及其衰也一寒一暑亦惟王之怨是
故聖人以民心爲存亡一失其心則無動而非怨矣實則謂
之私罰則謂之虐作德謂之僞不作則謂之謾出令而不信

與事而生謗皆主之咎也夏諺曰吾王不游吾何以休吾王不豫吾何以助游豫且以爲德豈有風雨寒暑之怨乎此言亦善

呂刑

林氏曰唐孔氏薛氏以贖爲罰刑爲辟篇中所言百鍰贖也墨辟至於大辟刑也此蓋欲應序中所言包括一篇之義故分贖刑爲二舜典曰金作贖刑與此贖刑何以異而必分之乎殊不知五十八篇序有包括一篇之義者亦有但言大略者不可繫觀也

或問典獄非記于威諸家多以爲戒當時典獄何也曰此一意乃全舉古訓以示訓至後章嗟司政典獄而下方是戒當時之臣文意甚明故從孔氏作堯時典獄之臣兼克天德而作元命亦非當時之臣所能及穆王所以望其臣語自有別致

之餘章可見

或問孔氏謂五刑之疑則赦而從罰諸儒所共遵而老泉之論

大近人情

老泉曰大罪固有疑今有人或誣以殺人之心而不實

以自明者有誣殺人而官不能折其實者易情不可以
誠殺人之罪坐之由是有誣殺之律當死而流使殺者不能自明者
耶去死而得流刑已酷矣使殺者誠殺人者即流而不死刑已寬矣
是皆失其實則無辜者多然使律者易免今欲使不失實則莫若重
贖彼謀殺者雖或無辜亦不至殘其支體若其有罪則雖不受刑固

已足於
贖金矣

今乃取王說何也曰五刑不簡正于五罰不簡謂罪

不當於五刑若今世有罪而情理可憫則與之從輕者是也

故從恕而用罰非謂疑其無罪而姑罰之也若夫疑則獄疑

而不可知者也若為盜而無贖證殺人而無明驗是為疑獄

疑則不可知其人為有罪矣不可知其為有罪雖輕罰猶不

加況加以重罰乎故今世疑獄雖殺人之罪而不敢遽加以

刑蓋不知其為果殺人故也若以為重罪之疑而加以重罰

受罰者果何辜哉先王之制必不爾也故曰五刑之疑有赦

赦則釋之而已若更有罰何足以爲赦新安王氏辨之詳矣
且老泉謂或有誣以殺人而不能自明者有誠殺人而官不
能折其實者所以必責於贖且不能自明與不能折其實皆
據他人之知者言之耳彼或不能自明官或不能折其實上
之人又安能知其爲疑哉使果知其爲不能自明者耶則是
已知其非罪矣非所謂疑也罰焉可加乎果知其爲殺人而
不能折其實耶則是殺人無可疑特吾未能折其實耳天下
之理固未有爲其事而果無實者特患聽獄者不能詳推之
耳果無實之可折是真可疑者也又焉可復加以罰哉兼諸
儒多謂五刑之疑有赦即所謂正于五罰五罰之疑有赦即
所謂正于五過經文不應若是重複蓋五刑五罰五過皆所
以治之故皆以正言是皆明知其罪之所止者也至於五刑
之疑五罰之疑則是不知其爲有罪者也則直赦之而已非

惟合於人情法意而上下文支派聯絡亦皆曉然矣或曰五刑不簡正于五罰若五刑之疑者既已竟赦之矣則又安得有所謂五罰之疑者哉曰刑不簡而正之五罰蓋明知其罪不當於刑而罰之也其有罪不當於刑而宜罰者而其所以致此罰罪之由或疑而無證則爲五罰之疑矣故疑亦赦之也或曰罪不當於大辟何不減爲宮罪不當於宮何不減爲剕乃從罰何耶曰此先王所以制爲贖刑以代其傷殘支體之慘而寓其仁以全民生者正在是也漢孔氏亦謂不降相因乃古之制唐孔氏亦謂決刑非所犯故不得降相因如後世減降之律斯言得之矣

五辭簡孚正于五刑蓋情罪灼然當刑而不可出脫者也五刑不簡正于五罰如有累罪於此而不簡欲竟加以墨又似失之重欲捨之則又不可縱蓋有罪而情理可憫所謂不當

刑者也。故恕之而從罰。如今世之徒罪條目多矣。折肢損眼者當徒而刃傷者亦當徒。刃傷比之折肢損目。其犯之輕重不等矣。喻如折肢損目。則使之受徒刑。而刃傷者則恕而受徒罰。刃多而傷深者受徒刑。刃少而傷淺者受徒罰。是所謂五刑不簡而正于五罰者也。刃少而傷淺者。固當罰。然所以刃而傷之者。或出於被迫。我而我不得應之。或不無意而偶加之。則其情理又輕矣。故罰之不服。而又正于五過。皆是明知其情罪之所止者也。疑則不能知其人之爲罪也。故直赦之。蔡氏曰。此篇專訓贖刑。蓋本舜典金作贖刑之語。然舜典所謂贖者。官府學校之刑。爾若五刑。則固未嘗贖也。五刑之寬。惟劓以流。鞭扑令穆。王贖法雖大辟亦與其贖免矣。漢張敞以討羌兵食不繼。建爲八穀贖罪之法。初亦未嘗及夫殺入及盜之罪。而蕭望之等猶以爲如此。則當有得生質者。獨

死恐開利路以傷治化言謂慶虞之世而有是贖法哉
出於陶唐虞夏者所當知要之得王之體統非盡合古制而所
廢止其於不顧者非明知其罪而故之類而張氏之說也

文侯之命

或問王氏言侵越我土地殘傷我人民不載何也曰大戎殺幽
王周室大壞王降而國風豈止侵土地傷人民而已去之則
無不包矣

費誓

秦始皇驅夷狄出塞外此非先王之智力不及始皇蓋先王至
仁兼覆戎夷錯居內地者平時與之相安於無事至其或叛
則征之服則撫之不為已甚故不暇聲庭搃穴而逐之也要
之政治苟修雖有戎狄不能為患適足以為吾之法家辨士
耳政治苟亂雖無夷狄骨肉自仇讎故斥逐夷狄不足以救
秦之亡而後世徒或之論則又審於自量者也

林氏曰戎夷錯居魯之境內在夷徐奄預武庚之亂驕悍未服周封建諸侯以周公居魯太公居齊此二人親賢之最而分地乃介於戎夷之間去周其遠則以控扼東夷故也周公留輔周室使其子伯禽受封於魯東夷之心必不利於魯之建國故伯禽始居曲阜而戎夷並興者蓋與之爭魯也按史記太公封於營丘夜衣而行黎明至國萊人來伐與之爭營丘周家初定未能安集未方是以與太公爭國淮夷徐戎之於曲阜亦猶萊夷之於營丘徐淮夷壤地相望有唇齒犄角之勢服則俱服叛則俱叛考武閼宮之詩可見東郊不開魯哥謂危矣而伯禽能為戰守之備以待之號令明而賞罰信卒使我夷遠遁遂以立魯社稷輔成周家磐石之勢可為萬世法故錄於帝王誓命之末

或問三郊二遂漢孔氏及林氏東萊諸家皆以為東郊受敵故

止言三面然不言三郊三遂而言三郊三遂何也曰夏謂大國總四面而言之止於三郊三遂耳不必泥東郊不開之說以爲有四郊四遂也若指四面而言則天子六卿亦可以謂之四郊矣此說已詳況東郊不開自指夷戎並興於東邊故東郊儆備其門不敢開非謂其已至東郊兼郊在十里之外若至東郊則已達城下況蕃在東海郡後爲季氏邑必非東郊之地也東郊不開猶漢世烽火通於甘泉而棘門霸上皆屯兵以待之非謂匈奴已至此是楚七國反閉函谷關亦非謂其兵已至關下也

或問東坡言費誓言征言桀而不言戰蓋妙於用兵如何曰東坡謂伯禽捨東郊而往搗我夷之巢穴此乃後世行險之師伯禽規模止爲不可勝之策蓋王者節制之師也恐未必若此而所以不戰者蓋此誓乃以於治兵之時非如秦誓牧誓

臨戰而誓故不言及戰然要之此後不曾及於戰則是必不戰也但不如林說圓混耳

秦誓

或問先儒言王者之澤至文侯之命已竭受之以誓誓以法制之在故國猶可因也受之以誓誓以義理之在人心猶可復也充穆公之心而因伯禽之法帝王何遠之有今不載何也曰伯禽之誓自作於成王之時恐不可謂之法制之在故國義理之在人心無時而不然亦待秦誓作而始知其人在人心者可復也夫子定書其可以垂教者不間諸侯之事皆錄之於帝王之末意思平正自有餘味或曰無垢謂夫子傷平王不能復讎明王道以爲若效伯禽用兵則大戎可滅效穆公悔過則聽言用賢王道可興此論甚高不取何也曰伯禽之用兵穆公之悔過將爲百王法其特平王可用而專爲平王

中惟酒也故王洽代吳杜預遺之書曰足下當徑取林陵自以

設哉如前說則無垢之意已在其中如無垢之意則夫子定

書之意似狹而其味反薄也或以為夫子繼周百世可知必

知秦之有天下故終秦如此則其牽強不必辨也

或問責人無難數語諸家皆以為穆公語而子以為古人之言

何也曰上文之言古人曰下文言我心分別甚明兼又文順

而意暢若操以為穆公之語非惟強自分截文意亦齟齬也

或問民訖自若是先儒多以為人情不美如何曰孔說理自正

當若以為民情不美非惟殺風景亦豈可以為群言之首

或曰由一人與一人之度多以為穆公自其身而言如何曰此

公上文兩節之意極明古者稱一人袁公誅孔子稱一人子
貢病之穆公決不敢為此犯分之語况語意與上文不相接
乎